



Rabu, 25 Desember 2024

Ogen: Matius 2:1-12



Mereken Si Mehulina



Natal salah sada perayaan si mbelin i bas Gereja. Ipersiapkan sada seh dua bulan si lewat. Erbage persikapan sinilakoken subuk bagin acara (lit si latihan koor, vokal group, solo, fragmen, drama ras sidebanna), bagin komsumsi pe enggo ipanjari. Penampilen pe asa bancina si mejilena, si metunggungna e maka la sitik si erbahan baju baru, seragam ras sidebanna. Dekorasi pe enggo ilakoken benaken tanggal 1 Desember nari, rikut pe pengkotbah enggo iaturken segelah makna natal e tuhu-tuhu idatken perpulungen. Bagenda me silakoken guna ngerayaken ketubuhen Jesus e.

Guru-guru Timur pe ngelakoken persikapan guna jumpa ras raja penampat e, isungkunina i ja kin IA tubuh, ngit ia ngoge kerna nubuatan-nubuatan si ndube, janah la persoalen man bana latih. Teridah arah nggitna ia erdalan mentasi sada kuta ras kuta sideban guna jumpa ras raja e. Kinilatihenna e erbuah bas paksana, jumpa me ia ras Raja e, meriah ukurna nangtang kerina kinilatihen si ndube. Erjimpuh ia nembah man Anak e, janah ipersembahkenna me si enggo ibabana bas kutanan nari e me emas kumenen ras mur. Emas simbol keriahen ukur ras kinibayaken, kumenen jadi simbol kebadian (persembahen si semal lit i bas kalak Jahudi guna itutung man Dibata) ras ncidahken kiniersadan Tuhan. Mur simbol penghormaten ras pengabdin. Tradisi paksa si e, emas kumenen ras mur e jadi luah kehamaten man raja entah dewa/i. Alu kata sideban Jesus e aminna pe mbaru tubuh enggo iakui sebage raja emaka si mehulina me ibereken. I bas natal enda pe tole ipersingeti kita guna mereken si mehulina si lit bas kita, tole si sungkun dage pusuhta kai nge si mehulina bas kita?